

**ՄԿՐՏԻՉ ՊԵՇԻԿՈՒԹՅԱՆԻ  
ԱՂԳԱՅԻՆ-ՀԱՍԱՐԱԿԱԿԱՆ ԳՈՐԾՈՒՆԵՈՒԹՅԱՆ  
ԳՆԱՀԱՏՈՒՄԸ ԱՐՇԱԿ ՉՈՊԱՆՅԱՆԻ ԿՈՂՄԻՑ**

*Վաչագան Ավագյան*

Նշանակալից է Արշակ Չոպանյանի դերը հայ մշակույթի պատմության մեջ: Նշանակալից է թե՛ երկարակեցության (շուրջ կեսդարյա անխոնջ ու անդու աշխատանք), թե՛ գրականության, նրա անցյալի ու իր ժամանակի ընթացքի նուրբ ու խորը դիտարկումներով, թե՛ հայ և համաշխարհային մշակույթի խաչաձևումների բացահայտումներով և թե՛ անաղարտ ու մաքուր, պատեհապաշտությունից դուրս, արդար նվիրումով իր ազգին ծառայելու անմարելի ձգտումներով:

Չոպանյանի վաստակը բացառիկ է հատկապես քննադատության ու բանասիրության ասպարեզներում: Նրա հզոր գրչով կյանքի կոչվեցին հայ հին մշակույթի շատ մոռացված արժեքներ, արևմտահայ գրականության մեջ նա հիմք դրեց գիտական քննադատությանը, սկզբնավորեց մենագրության ժանրը՝ տալով դասական գրողների ստեղծագործությունների ուսումնասիրության ինքնատիպ ու հիանալի օրինակներ:

Չոպանյանի մենագրական լավագույն աշխատություններից մեկը՝ «Մկրտիչ Պեշիկթաշյանի կեանքն ու գործը» գիրքը, վերջինիս մասին եղած լավագույն ուսումնասիրություններից է: Այն լույս տեսավ 1907 թվականին Փարիզում: Դա ըստ էության Պեշիկթաշյանի մասին առաջին առավել ամբողջական բանասիրական խոսքն էր, որ առ այսօր նրա կյանքի ու գործի, նրա ժամանակի ու միջավայրի ուսումնասիրության թերևս միակ ու ամենահավաստի աղբյուրն է<sup>1</sup>:

Մկրտիչ Պեշիկթաշյանը Չոպանյանին հետաքրքրում էր դեռևս 1890-ական թվականներից<sup>2</sup>. այդ հետաքրքրությունը պայմանավորված էր ոչ միայն Թիֆլիսի հայոց հրատարակչական ընկերության վարչության՝ գրականագետին Պեշիկթաշյանի կյանքի մասին աշխատություն գրելու առաջարկությամբ, այլև

<sup>1</sup> Տե՛ս **Մնացականյան Լ.**, Քսաներոդո դարասկզբի արևմտահայ գրական քննադատությունը, Եր., 1990, էջ 262:

<sup>2</sup> Տե՛ս **Զօպանեան Ա.**, Թատերգութիւնը մեր մէջ, «Մասիս», 1893, № 3975: Մկրտիչ Պեշիկթաշյանի քերթածներն ու ճառերը, ծանօթագրութիւններով հրատարակեց Ա. Զօպանեան, Փարիզ, 1904:

ավելի շուտ «այդ ոսկի սրտով մարդուն» կյանքի և գործի նկատմամբ քննադատի անձնական «գործվալից հիացմամբ»<sup>1</sup>:

Մկրտիչ Պեշիկթաշյանին անդրադառնալը Չոպանյանի համար ուներ կրկնակի նշանակություն, որ 1899 թվականին գրված նամակներից մեկում պարզում է ինքը՝ հեղինակը. «Ես կփափագիմ ամբողջական, կապարյալ գործ մը արտադրել, որովհետև այդ նյութը ինձի շատ սիրելի է, և ատկից զատ շատ բազմակողմանի և դժվարին է, պատկերն ըլլալով ոչ միայն անձի մը, այլ ամբողջ շրջանի մը հոգեբանություն»<sup>2</sup>:

Հենց սկզբից էլ գրականագետը նպատակ էր ունեցել ձեռնարկել ոչ միայն Պեշիկթաշյանի կյանքի ու գործունեության ուսումնասիրությունը, այլև այդ ուսումնասիրության միջոցով կամ նրան զուգահեռ վեր հանել 19-րդ դարի 50-60-ական թվականների արևմտահայ հասարակական-քաղաքական, մշակութային կյանքի ողջ պատկերը, որը և գերազանցորեն իրագործել է: Ինչպես նկատում է Լ. Մնացականյանը, այս ուսումնասիրության մեջ դրսևորվել է Չոպանյանի քննադատական «բնավորության» մի ուրիշ կողմը՝ հասարակական ու մշակութային կյանքի բազմազան ամբողջությունը մեկ հայացքով ընդգրկելու ձիրքը և բանասեր հետազոտողի հմտությունը<sup>3</sup>:

Հիրավի, այս ուսումնասիրությունը պատմական ժամանակաշրջանի ու միջավայրի իր լայն ընդգրկմամբ և արտացոլման խորությամբ դարձել է 1850-60-ական թվականների արևմտահայ կյանքի մի յուրօրինակ տարեգրությունը:

Գրքի հենց «Ներածութեան» մեջ Չոպանյանը շեշտում է Մկ. Պեշիկթաշյանի կյանքին ու գործունեությանը անդրադառնալու կարևորությունը, մատնանշում նպատակները: Գրքի ներածությունը որոշ իմաստով ծրագրային նշանակություն է ստանում հետագա ողջ բովանդակության համար, և որը միաժամանակ օգնում է ճիշտ հասկանալու գրականագետի՝ պատմական ժամանակաշրջանի հասարակական-քաղաքական և մշակութային իրադարձությունների, դեպքերի ու դեմքերի, թվերի, փաստերի, անունների մանրամասն ու հանգամանորեն ներկայացնելու միտումը. «Կարևորութիւնը,– գրում է Չոպանյանը,– զոր այդ գործին ու կեանքին ծանօթացումը ունի ինքնին, կը շեշտուի ու կը բազմապատկուի այն տեսակէտով, որ այդ կեանքին ու այդ գործին ուսումնասիրութիւնը իր հետ պիտի բերէր ի հարկէ ուսումնասիրութիւնը մեր ժամանակակից պատմութեան ամենէն նշանակալից, ամենէն շահեկան շրջաններէն մէկուն: Պէ-

<sup>1</sup> Չոպանյան Ա., Նամականի, Եր., 1980, էջ 49:

<sup>2</sup> Նույն տեղը, էջ 61:

<sup>3</sup> Մնացականյան Լ., Քսաներորդ դարակազմի արևմտահայ գրական քննադատությունը, Եր., 1990, էջ 262:

շիկթաշլեանի կեանքը պատմել ու գործը բացատրել՝ գրեթէ իր ժամանակակից ազգային բովանդակ կեանքին պատկերը գծել ըսել է, որովետեւ Պէշիկթաշլեանի դերը՝ այդ շրջանին մէջ ի յայտ եկող երեւոյթներուն նոյն իսկ այդ շրջանը ծնուցանող տարրերուն ամենէն կարեւորներէն ու բազմադիմիներէն մէկն է»<sup>1</sup>:

Ընդգծվում է նաև Պէշիկթաշլեանին անդրադառնալու հեղինակային միտումի մյուս կողմը: Բարձր գնահատելով բանաստեղծի գրական-հասարակական գործունեության նշանակությունը՝ Չոպանյանը ձգտում է նրան դուրս հանել իր ժամանակի սահմաններից և որպես հայրենասիրության, քաղաքացիական բարձր ոգու լավագույն օրինակ՝ ներկայացնել ժամանակակիցներին՝ նպատակ ունենալով նրանց ներշնչել բարոյական վեհ ու ազնիվ զգացումներ, բարձր հայրենասիրական նպատակասլացություն: Կնշանակի՝ Պէշիկթաշլեանին անդրադառնալով Չոպանյանը նպատակ ունի ոչ միայն հայ գրականության համաստեղության խոշոր ներկայացուցիչներից մեկին վեր հանել, որը ինքնին անհրաժեշտ էր ու շահեկան, այլև նոր սերնդին «հրահանգիչ ու ազնվացուցիչ» զգացումներ ներարկել քանի որ Մ. Պէշիկթաշլեանի կյանքն ու գործը «գաս մը կարող է ըլլալ ապագայ սերունդներուն»<sup>2</sup>:

Մկ. Պէշիկթաշլեանի ստեղծագործական հասունացումը զուգահիշեց 19-րդ դարի 50-ական թվականներին Օսմանյան կայսրության մեջ տեղի ունեցող տնտեսական-քաղաքական այն մեծ տեղաշարժերին, որոնք սկսվել էին դեռ դարի առաջին կեսերից: Սուլթանական լծի տակ տառապող ժողովուրդների պայքարը, ներքին խռովությունները, այնուհետև նաև արտաքին քաղաքականության ճակատներում կրած պարտությունները թուրքական կայսրությանը ստիպեցին գնալ տնտեսական-քաղաքական փոփոխությունների: Թուրքիայի կյանքում տեղի ունեցած լուրջ տեղաշարժերը արձագանք գտան ինչպես թուրքական գերիշխանության տակ գտնվող ազգերի, այնպես էլ Կ. Պոլսի և ընդհանրապես Տաճկահայաստանի քաղաքների հայկական շրջաններում: Հայ հասարակական-մշակութային կյանքը բռնկվեց մի իսկական ազգային երկունքով՝ արթնանալով «լեթարիական քունէն»:

Պէշիկթաշլեանը դարձավ իր սերնդի տրամադրությունների լավագույն թարգմանը՝ սեփական ստեղծագործությամբ ու անձնական գործունեությամբ նպաստելով հայ նոր, առաջադիմական շարժումների կազմակերպմանն ու զարգացմանը: Ժամանակի հասարակական-քաղաքական, մշակութային լավագույն գործիչների՝ Ստ. Ոսկանյանի, Հ. Սվաճյանի, Ն. Ռուսինյանի, Գր. Օտյանի և այ-

<sup>1</sup> **Չոպանեան Ա.**, Մկրտիչ Պէշիկթաշլեանի կեանքն ու գործը, Փարիզ, 1907, էջ Ե-Զ (Ներածութիւն):

<sup>2</sup> Տե՛ս **Դալլաքյան Կ.**, Արշակ Չոպանեան, Եր., 1987, էջ 213:

լոց շարքում նա բարձրացավ իբրև ամենից հատկանշական դեմքը՝ իր կարևոր նպաստը բերելով հատկապես գեղարվեստի, ազգային գրականության զարգացման և «հայ սրտերուն» ազգային միասնության դավանանքը ներարկելու մեծ գործին, նկատում է Չոպանյանը<sup>1</sup>:

1850–60-ական թվականների սերնդի առաջավոր գործիչների, նրանց շարքում հատկապես Պեշիկթաշյանի գործունեության բարձր գնահատումը Չոպանյանի համար անշուշտ վեր էր սովորական շարադրանքի նշանակությունից: Երկրորդելով պիտի ասել, որ գրականագետը այդ շարադրանքից դուրս հետապնդում էր ավելի հեռուն միտող նպատակներ, որոնք կապվում էին իր օրերի հետ և մղված էին պատմական անցյալի անձնուրաց դեմքերի ու նրանց հերոսական գործունեության օրինակով ոգեշնչել ժամանակակից սերնդին, վերջինիս մեջ զարգացնել ազգային ինքնաճանաչողության ու ինքնագիտակցության զգացումը, նրան դաստիարակել օտարի լուծը թոթափելու վճռական ոգով, պատրաստել ազգային-ազատագրական գործին նվիրված խիզախ հայրենասերներ:

Նույն նպատակով Չոպանյանը հանգամանորեն կանգ է առնում նաև Պեշիկթաշյանի մանկավարժական-հասարակական գործունեության մանրամասների վրա: Իսկ խոսելով 1862 թվականին Ջեյթունի ապստամբության օրերին բանաստեղծի ծավալած գործունեության մասին՝ Չոպանյանը գրում է. «Պեշիկթաշյանի ընթացքը այդ ծանրակշիռ պարագային մէջ, իր բացայայտ խանդավառ համակրությունը Ջեյթունի հերոսներուն համար, իր մտերմական յարաբերությունները Ջեյթունի Պոլսոյ ներկայացուցիչներուն հետ, ցոյց կուտան որ այդ թափշէ ու մետաքսէ հոգիին մէջ պողպատէ խորք մը կար, և թէ ան կը սիրէր քաջութիւնը ոչ միայն երգերու մէջ ու թղթի վրայ, այլ մանաւանդ գործի մէջ»<sup>2</sup>: Այս առումով Պեշիկթաշյանը դարձյալ տալիս էր լավագույն օրինակը:

Պեշիկթաշյանի թատերգությունները գնահատելիս ուսումնասիրողը դարձյալ շեշտը դնում է հեղինակի ստեղծագործական այն արժանիքների վրա, որոնք հետապնդում էին նույն՝ ազատասիրական ու լուսավորական նպատակները: Թատրոնը, ինչպես նկատում է գրականագետը, բանաստեղծի համար նաև լավագույն միջոց էր՝ ատելություն արթնացնելու ազգային կրոնական պառակտումների նկատմամբ, որոնք երկար դարեր իրենց վայրագ գժտություններով քայքայում էին ազգային միասնությունը, «հայ ազգին հոգւոյն ու մարմնոյն փաթթուած»՝ քամում նրա արյունը. «Հայ բեմը հիմնելու զինքը մղող ամենէն

<sup>1</sup> Տե՛ս **Չոպանեան Ա.**, Մկրտիչ Պեշիկթաշլեանի կեանքն ու գործը, Փարիզ, 1907, էջ 31:

<sup>2</sup> **Չոպանեան Ա.**, Մկրտիչ Պեշիկթաշլեանի կեանքն ու գործը, Փարիզ, 1907, էջ 71:

էական շարժառիթներէն մին՝ կրթիչ ու հայրենաշունչ ներկայացումներով ամէն դաւանանքէ Հայեր քով քովի բերելու, միևնոյն «ազգային» զգացման մէջ զանոնք իրարու հետ կապելու տենչն էր»<sup>1</sup>:

Պեշիկթաշլյանի՝ առանց որևէ կրոնական-դավանաբանական խտրութեան հայութեանը մեկ «միասնական ազգային զգացման մէջ» միավորելու ձգտումը համարելով բանաստեղծի հանրային գործունեութեան ամենածանոթ կետը՝ Չոպանյանը անհրաժեշտ է գտնում ոչ միայն ներկայացնել պոլսահայ անցողորմները, հատկապէս կրոնադավանաբանական պայքարը, այլև տալ հայոց մեջ կաթողիկոսութեան առաջացման պատմությունը, որոնց և նվիրված է գրքի ծավալի գրեթէ կեսը: Այս հանգամանքը հուշում է, որ գրականագետը նպատակ ուներ Պեշիկթաշլյանին ներկայացնել որպէս կաթողիկոսական ու լուսավորչական պառակտումի հաշտեցման մեծագոյն պաշտպան ու զովերգու, ուստի և նրա աշխատանքը ձևավորվել ու շարադրվել է հենց այդ կանխադրույթով, այդ տեսակետով: Չոպանյանը ձգտում է ապացուցել, որ Պեշիկթաշլյանի գրական-հասարակական գործը հիմնականում եղել է կաթողիկոսական լուսավորչական հայութեան դավանաբանական պառակտումի հաշտեցման ճիգ, ձգտում՝ «բոլոր Հայերը եղբայր ու գործակից դարձնել ազգային մտաւոր յառաջադիմութեան գործին մէջ»: Եվ ամենևին պատահական չէ, որ գրականագետը Պեշիկթաշլյանի ստեղծագործութեան մի ծանրակշիռ մասը իր բովանդակությամբ բխեցնում է հենց այդ մտայնութունից<sup>2</sup> և գրողի «Եղբայր եմք մեք» երգով է գնահատում նրա հասարակական ամբողջ գործունեությունը. «Եղբայր եմք մեք» երգին մէջ է որ Պեշիկթաշլեան խտացուց գերագոյն արտայայտութիւնը իր բոլոր այդ ազնիւ զգացմանց... «Եղբայր եմք մեք»ը հայկական միութեան Մարտէյեէզը եղաւ... Այդ երգը ելեկտրականացուց հայ սրտերը, հալեցուց սառույցը որ դեռ կը մնար հռովմէական ու լուսավորչական Հայոց միջև, ամենէն սիրական, ամենէն յաճախ երգուած երգը դարձաւ, ամէն երեկոյթի, ժողովքի, հանդէսին մէջ հնչեց ու հոգիներուն վրայ խաղաղութեան, եղբայրութեան, սիրոյ արև մը քաղցրաշող ծագեցուց»<sup>3</sup>:

Հանգամանորեն ծանրանալով հատկապէս 19-րդ դարի առաջին կեսին Պոլսում և մյուս հայաշատ շրջաններում լուսավորչական ու կաթողիկոսական հայերի,

<sup>1</sup> Նույն տեղը, էջ 71:

<sup>2</sup> Տե՛ս **Սաֆարյան Վ.**, Մկրտիչ Պեշիկթաշլյան, Եր., 1972, էջ 46: Սույն մենագրության մեջ ընդհանրապէս հեղինակը բազմաթիվ գրականագիտական, պատմաբանասիրական հարցերում՝ կապված բանաստեղծի ստեղծագործական ժառանգության ու գործունեության հետ, իր անհամաձայնությունն է հայտնում Ա. Չոպանյանի տված գնահատականներին ու բնութագրումներին: Այդ հարցերը, ինքնըստինքյան կարևոր ու հետաքրքիր լինելով հանդերձ, չեն մտնում մեր այս հոդվածի նպատակների մեջ:

<sup>3</sup> **Զօպանեան Ա.**, Մկրտիչ Պեշիկթաշլեանի կեանքն ու գործը, Փարիզ, 1907, էջ 205-206:

մասնավորապես «Հակահասունեան կուսակցութեան» և Հասունյանի ու «Հասունեաններու պէս այլանդակ Հայերի» ընդհարումների և դրանց ծանր հետևանքների նկարագրության վրա՝ Չոպանյանը թերևս ավելի շուտ ձգտում է անցյալի պատմական իրողություններն իրենց դասերով ու ստացած գնահատականներով առավելապես օգտագործել ներկա օրերի համար՝ այդ կերպ պատմությանը տալով արդիական գաղափարախոսության նշանակություն: Ընդհատ է, դավանաբանական վեճերը Չոպանյանի ժամանակ, ինչպես և ինքն է խոստովանում, բավականին թուլացել էին, սակայն «կրօնական մոլեռանդություն» այդ «հին թոյնը» դեռ բոլորովին չէր ջնջվել: Ուստի միանգամայն հասկանալի է այդ խնդրի հետ կապված պատմական դասերի վրա շռայլորեն ծավալվելու գրականագետի միտումը և դավանաբանական պառակտումների վերացման գործում թե՛ Պեշիկթաշյանի, թե՛ նրա նախորդների և հաջորդների կատարած մեծ գործի հանգամանալից նկարագրությունը:

Այսպես, ազգային զարթոնքի, ազգի համախմբման պահանջով Չոպանյանը հանձնարարում է բոլոր այն դասերը, ինչ հնարավորություն էր տալիս Պեշիկթաշյանի հասարակական գործունեությունն ու ստեղծագործությունը: Այսօր էլ ազգային միասնության, ոգու առողջության ու մաքրության խնդիրները մեր իրականության մեջ պահպանում են իրենց կենսական հրատապությունը: Դրսևորման բնույթով ու ձևով տարբեր, բայց էությունաբար հաճախ նույնանման դավանաբանական բազմաթիվ խնդիրներ էր հետապնդում մեր հասարակությանը, երբեմն առաջ բերում պառակտումներ: Այդ իմաստով թե՛ Պեշիկթաշյանի անձն ու գործը, և թե՛ նրա գործունեությանը Արշակ Չոպանյանի տված գնահատականները իրենց իդեալային արժեքով մնում են նույնքան արդիական, որքան Պեշիկթաշյանի ժամանակ, որքան քսաներորդ դարասկզբին:

**«ՄԿՐՏԻՉ ՊԵՇԻԿԹԱՇԼՅԱՆԻ ԱԶԳԱՅԻՆ-ՀԱՍԱՐԱԿԱԿԱՆ  
ԳՈՐԾՈՒՆԵՈՒԹՅԱՆ ԳՆԱՀԱՏՈՒՄԸ  
ԱՐՇԱԿ ՉՈՊԱՆՅԱՆԻ ԿՈՂՄԻՑ»:**

**Վաչագան Ավագյան**

**Բանալի բառեր՝** Արշակ Չոպանյան, Մկրտիչ Պեշիկթաշյան, բանասիրություն, գրականագետ, հասարակական-քաղաքական, արևմտահայություն, հայրենասիրություն, Թուրքիա, դավանանք, մշակույթ, ազգային ինքնաճանաչողություն, լուսավորություն, կրոնադավանաբանական պայքար, կաթոլիկություն, լուսավորչականություն, գաղափարախոսություն:

Իր «Մկրտիչ Պեշիկթաշյանի կեանքն ու գործը» ուսումնասիրության մեջ Արշակ Չոպանյանը, պատմաբանի ու գեղագետի լայն հայացքով ներկայացնելով 1850-60-ական թթ. արևմտահայ գրական-հասարակական կյանքի ներքին տեղա-

շարժերը, ոչ միայն նորովի բացահայտում է ժամանակի ազգային զարթոնքի դարաշրջանը, այլև գրողի ու ազգային մեծ գործչի անձնական ու հասարակական կենսագրությանը տված բնութագրումների միջոցով հայտնաբերում է ժամանակների կապը, նրա կյանքի ու ստեղծագործության գործնական-գեղարվեստական և բարոյական դասերը ժամանակակից սերնդի համար: Մկ. Պեշիկթաշյանին ներկայացնելով որպես կաթոլիկական ու լուսավորչական պառակտումի հաշտեցման մեծագույն ջատագով՝ Ա. Չոպանյանը ձգտում է անցյալի պատմական իրողություններն իրենց դասերով ու ստացած գնահատականներով առավելապես օգտագործել ներկա օրերի համար՝ այդ կերպ պատմությանը տալով արդիական գաղափարախոսության նշանակություն: Այդ դասերն ու գնահատականները իրենց իդեալային արժեքով մնում են նույնքան արդիական, որքան անցյալում:

**“ОЦЕНКА АРШАКА ЧОПАНЯНА НАЦИОНАЛЬНО-ОБЩЕСТВЕННОЙ  
ДЕЯТЕЛЬНОСТИ МКРТИЧА ПЕШИКТАШЛЯНА”.**

*Вачаган Авагян*

*Ключевые слова: Аршак Чопанян, Мкртич Пешикташлян, филология, литературовед, общественно-политический, западные армяне, патриотизм, Турция, вероисповедание, культура, национальное самосознание, просвещение, религиозная борьба, католицизм, армяно-григориянское вероисповедание, идеология.*

В своем исследовании “Жизнь и деятельность Мкртича Пешикташляна” Аршак Чопанян, с точки зрения историка и искусствоведа представляя внутренние изменения 1950-60-ых годов в литературно-общественной жизни западных армян, не только по-новому раскрывает эпоху национального пробуждения того времени, но и с помощью характеристик данных личной и общественной биографии великого автора и национального деятеля выявляет связь времен, нравственные уроки его жизни и творчества для современного поколения. Представляя М. Пешикташляна как главного поборника за примирение раскола между католичеством и армяно-григориянством, А. Чопанян стремится, главным образом, использовать исторические события прошлого с их уроками и полученными оценками для нынешних дней. Таким образом, он стремится дать истории значение актуальной идеологии. Эти уроки и оценки с их идеалистичными ценностями остаются такими же актуальными, как и в прошлом.

**“ARSHAK CHOPANYAN’S ASSESSMENT TO THE NATIONAL-SOCIAL  
ACTIVITY OF MKRTICH PESHIKTASHLEAN”.**

*Vachagan Avagyan*

*Keywords: Arshak Chopanyan, Mkrtich Peshiktashyan, philology, literary critic, social-political, western Armenians, patriotism, Turkey, creed, culture, national self-knowing, enlightenment, religious-creed struggle, Catholicism, Gregorian, ideology.*

Arshak Chopanyan in his “Life and Activity of Mkrtych Peshiktashlean” research work represents the internal moves of western Armenian literal-social life of 1850-60 with wide view, and not only reveals the epoch of the national arousal of that period in a new way, but also reveals the connection of the periods through descriptions of the given personal and social biography of the writer and a national great figure, and the practical-fictional and moral lessons of his life and works for the contemporary generation. By representing Mk. Peshiktashyan as the greatest apologist for reconciliation of Catholic and Orthodox split, A. Chopanyan attempts to use the historical events with its lessons and acquired assessments for the most for the present day, and in that way has given the meaning of modern ideology to the history. These lessons and assessments remain with their ideal values as modern, as it was in the past.